

## Каркам па хорасаң нэңлүв хатд постадув

Ай кер тылащ нийлмет хаталн нэңат емаң хатд постадув. Шци веран там лапатаң кашң вошан, кашң куртан шци хатда постам уйтантап-сайт верыдылайт. Аңкет, шацет, аңқаңкет, ныйт, осхет, ай эвиет нумадмилайт па мойлаптылайт.

Хор: Альбина Тырлина



Овс мувеван нэ такды улты шир антом. Нэ алам кур пуңадан хошам. Лэтот кавартал, хоттэл хоятдал лэлды ант хашдат. Лув ёнтам луматты сохладн умащ пурамты, умащ карыты. Эл, кур, ёш ант потла.

Муң ханты нэңлүв юх сэварты верытлат, онас кирты артамлат. Тус па юраң нэңат онтасан ханты мир улапса ант хурдал. Лув ёнтты хорам ёлдал иты щуневпищев елды манты питал.

Муң хорамаң ханты нэңлүв па мир кутан елта ныдайт. Охеда понты хорамаң охшамдал, шуштэл порайн матты ки ищимет вотан полдыдайт. Лув

ёшладан ёнтам ханшидал лыт оведан, порхедан, понэдан па сак лопсэдан ал вордылат.

Картэң сэвлад шулиты сый онтасан елта шацлат. Ан лэхиттэл порайн луйт сыйдал па ант хурдылат. Ньюки па салтам вайң курылдалан ищимет кати иты пурмилат.

Аратал нэңата муң мойлапса ясаң китлув. Тумтака удаты, нэмолаты порайн ал мушитаты. Атом вер па шук нынана ант ат хойл. Нын улапсайн тови хатлат хорши ат ул. Няврэмлан, хилыдан няхмаң турсыйт хотланан иса ат шацлат... Емаң хатлан пилан!

Альбина Тоярова ханшам потар

### Хорам па юраң нэңат

Хоят айтэлн олаңн антел вантдалды па шацта мир вантты питал. Ищиты хошам ёхатл тут ими пилан. Сишн, анти тут иты улапса хуват мет мосл.

Нэ рупатайл вертал элты, лувел ёрэматы ант верытдалды: мосал хорам охшам, хорамаң ернас ёнттыя, хорам вай па муй иса.

Шци хорамдал иса лув ёнтдалды. Хун нэ ёнтасл, арыман рупитл, самаңа вератл, щит элты тайты сохат мет хошамшака йилат.

Хун ил омасты кум шитал, верытл ёнтасты. Ёнтастал элты аялта ханты арат арыял, няврэмдал ванапак омаслат па худантлат, хоты антиел туса вератл па сыяңа арыял. Эвие ки ванан, па йинтап ёша вул, антел элты вантман аялта уталтал.

Щимащ хорам па юраң нэңат муң кутлувн удлат. Ат лув шук ант вантлат, нуптаңа удлат. Няврэмладан, икидалан, похладан щалитман ат тайдайт! Умащ нэңиет, елды тумтака удаты!

Вудэң тащ хотатн рупитты хоятат кашң хатд тут ими пилан удлат. Ат давалман шай каварлат, нёхи шарытлат. Юш кутапн па ищиты. Ёлн, хот дыпиян, муй молты вер питал – арпелак иса нэ ёш верал. Юх халытты па сэварты – арпелак рупата нэ хоята хойл, уна пелка питам нэңат ищи рупитлат, ал щиты ант омаслат. Нэңат лэтот каварлат па хорам эплаң пасан семьяел ураңна омаслат.



Хор: Иван Сандрин

Иван Сандрин ханшам потар

# Ветеран ЯНАО нэм сытты ораңна

Ямал мув ветеран нэм тайты нэңхэт касң тыдащ холам щёрс солкува ясна пайтта веритлат. Топ ар пелак нэңху ант оцлат хоты щимащ почётной нэм сытта. Мет такан вахты вер «Ветеран ЯНАО» нэм ораңна, округ хоца ропытты талат. Ныңат ораңна щит, хольмаң педа вет тал, яхат – хольмаң тал. Щита ант лоңлат вутн яңхты, худ па вай велты ях, ор хатна ропытты ныңат. Щимащ ропата верты ныңат – хос тал, яхат – хольмаң педа вет тал.



Хор: Вера Лонгортова

Ропытты талат луңатты по-райна вантта питла: солтана яңхам талат, няврем сэмна питтал тал итна холам тал унты, ван със ант ропытты талат па социальной программа хоца пилтащиты талат – топ лув центр занятости эвалт партман олта маслат. Щи томпына холна, хой вул пелак нэңху вантман тайл, ищи почётной нэмна мата веритла. Молтасан камантсы знак отличия тайта

масл: ох майлапсы, мевал пос, медаль, губернатор эвалт маты майлапсы.

Щи ораңна тамаш нэпекат акатта масл:

- хор 3\*4;
- округ хоца ропытам талат арталаты нэпекат;
- майлапсы тайты арталаты нэпекат;
- нэм нэпек (паспорт);

«Ветеран ЯНАО» нэм сытта лытты нэңху масл:

Социальной защита хоца манта.

Масты нэпекат похла акатман, тохы мата.

Щи нэпекат вантты ораңна комиссия акатла, лув арталата питлат, мата маса анта.

Хоты региональной майлапсы сытта:

Мет алаңна ропытты мохыдал кутна нэңху лувел ямас эттада маслалды. Щит корпоративной знак олда веритал: благодарственной нэпек, почётной грамота. Щи юпина мули профильной департамент эвалт майлаптата питла. Щи ораңна кощайл нэпекат китал, па лавта, малай щи нэңху ораңна ишакты нэпек вахал, малай щи нэңху майлаптата масл.

Щиты, касң структура тал със март арат майлапсы квота тайл. Йи нэңху кат тал със йи пус топ майлаптата веритла. Алаң майлапсы ясна пайтты итна губернаторской майлапсына маты маса – ёңкем тал ропытта масл.

Хой регион ораңна волаң вклад верас маса нэңху лыл нох талас ант масл камн сот ишакты нэпек ропытты таха эвалт сытта, мохты губернатор эвалт майлаптада.

Вера Лонгортова  
хансам потар

## Энамты няврэмат Овс мув касапсаян кассат

Хащам лапатн Ямал мувев доват элты няврэмат лув кутладн касты ияха ёхтылдысат. Овс мув касапсаян лув талаң лапат хатл юрацсат. Касапса ус курк тыдащ 23 хатл элты па ай кер тыдащ 1 хатл унты.

Пулцаватна, эвиет па похиет кат 11-13 па 14-15 тал доват группаятан юрацсат. Лув Љорвош, Надымской, Тазовской, Пуровской, Ямальской, Красноселькупской, Кев сыл районат па Пулцавт элты ияха актащисат. Аратэдна 72 хоят ус. Лув кутладн вет касапсаятн юрацсат: худам пуш хой хуващак навармал, ухал шоппи хой арщак навармал, юх пилна хухалты, дайм хой хуващак воцккял па хой арщак тынщаң ёвалмал.

– Касты няврэмат кутан хантэт ищи вусат. Љорвош район элты 15 няврэм ёхтылдымал, – главный судья, секретарь соревнований Денис Сергеевич Лонгортов ястас.

Эвет кутн мет харщи Анастасия Рочева удмал. Лув, аратл, касапсаят щирн Ямал мувев доватан 3-мет места щитмал.

Щалта атэл касапсаятан кимет няврэмат ищи нох питсат:

- Анастасия Кельчина – 1 места – (ухал шоппи наварман);
- Ксения Рочева – 1 места – (тынщаң ёвалман);
- Мария Вальгамова – 2 места – (дайм воцккман па худам пуш навармиман);
- Тимофей Лонгортов – 2 места – (дайм воцккман);
- Дмитрий Яркин – 3 места – (дайм воцккман);

Щи тумпина Ямал доватна кат ялап рекорд этас:

- Константин Адер Самбург вош элты 10 метра молтаса, худам пуш хой хуващак навармиман, питас;
- Артём Талеев Кев сыл район Белоярск вош элты ул. Лув 710 пуш ухал шоппи навармас.



Хор: Василий Лонгортов

Иван Сандрин  
ханшам потар

Василий Сергеевич Лонгортов касты уталтаты няврэмалд пилн: Савелий Куртямов, Тимофей Лонгортов па Андрей Рохтымов.

## «Душа Севера» тус ясаң нэңхэт Пулцаватна акатлайт

Ямал мувна дов эвалт эватты «Душа Севера» Международной пормас эттыды-пилтащиты хар заявочной кампания пинтцас. Там пилтащиты хар Сергей Лугинин онтасна хонты кепа этас, щитна 2026-мет тал лувел постаса.

«Тус ясаң нэңхэт ораңна там сэңк волаң хар, пормаслал этталат. Верта хасты нэңхэт анта топ ясна ямас ропытта маслат, лув ищадтыдал верта понты дов хоца алаң эвалт

номасна мули хор хансат, щи юпина топ щи хор нэпек элты тулэл. Щи порайна топ лув ищадтыдал камн сот верта хасты ув пунсантал», – Ямал мув губернатор Окружной Дом ремёсел коща ның Вероника Могрицкая ясчат щиты хансас.

Ун кер тыдащ 24-мет хатл маса культураямала.рф портал хоца заявка китта рахал. Щита пилтащита веритлат народной художественной промысел мастерат, творческой коллективат, атэл ропытты нэңхэт, па

энамты нэңхэт 12-мет тал эвалт 15-мет тал маса – хой Ямал мув тус ясаң нэңхэт хоца онттылат. Щита китты ропатайт кураң вой, калаң, пеңкаң вой па па войт аңат эвалт верман олта маслат.

«Душа Севера» финал щёхар тыдащ 9-мет хатл эвалт 13-мет хатл маса Пулцаватна манта питал. Пилтащита ёхтам нэңхэт холам хатл със ропатайдал етсаптата маслалдал.

Вера Лонгортова хансам потар

# Вещкат нэ ёшатн улапса елды тула

Кашң тал кашң мувн нэңат емаң хатл постада па нэңат элды ханшда, потарда па арыда. Вуды тащ хотатн рупитты нэңат – щит юраң нэңат. Ун вошатн па па муватн щимащ рупата элды волды ант уйтла. Туп тата, холна муң мувдун вуды тащат шавидаят, нэңат ищи ар нэ-тап вердат. Нэ ки тащ хотатн антом – матты ки нушая питда. Нэ донщам хот хошма лэщатлады, сыстампалады па эпдаң дэтот кавартал. Иса муй мосал иса верал. Дув юх эватал па халытал, ёхи доңалтал па кур адал. Щит иса дув рупатайл.

Ид омасты кум антом. Сох таталты мосал, вай па сох лукаматы омпысыдыты па мосал. Щикут няврэмлад вошхемиты па лапатты. Етна пелка ёх тащ элды ёхи йилат – дув кешаел дэты пасан омасты па щи юпина шакъйиңка ювам сох соралты па пусты. Вуды хотатн сох пусты па ан лэхитты машина антом. Сишн щи вер иса ёшн верла. Муй арат йиңк мосал – иса нэ ёшатн алдаят. Касалты пораян хот лосытты па донщты вер иса нэ ёша питал. Щи арат юраң нэңат вуды тащ хотатн рупитлат!

Валентина Алексеевна Кондыгина 15-мет хатадн ай тахаят потты тылащ 1947-мет талн Катравозна сэма питас. Опращдал ултэд хуват вуды тащ хотатн рупитсат. Щиты Валентина ашкудайн нийл класс уталтыты етшам юпина мохты ёхи хащас. Аңкеда па ащеда касалты нэтап верас. Опращдалн шеңк яма уталгаса хоты мосал туңа-щира рупитты па мосты вер верты. Щалта 1979-мет талн дув рупатая Горковской оленеводческой совхоз хоца ханшдтала.

Щита дув 2001-мет тал унты рупитас па уйт лор тылащн пенсия щутщаты этас. Намн еша ус па щутщас. Ал омасты каш. Щалта товиян 2010-мет талн па рупатая этас. Ищи тахая рупатая вуса. Туп рупитам совхозд ялап нэмн понм – сельскохоз-зяйственное предприятие «Горковское». Инты унты дув холна рупитал. Энамты ёх элды ёхи ант хащад.

Рупитты тащ-ладн Валентина Алексеевна самаңа тайла па ишакда. Дув вещьката рупитал, верлад иса туңа-щира лэщатлады. Нэ рупатайл тумпина ёх хоятата нэтал тащ дойлдыты па мушмалтам каңаңат нох паватал. Хота мосал энамты



хойтата нэтал па ястал, хоты там па тум вер верты. Дув ийикел пидан хут няврэм

энмалсаңан. Похңалад ищи вудэт пидан улапсаел тулэд. Ун похал, Виктор, ултал хуват вуды леккара рупитас, ин па пенсия питас па ищипа вуды хота нэтты ёхтылдыл. Айшак похал, Иван, дув пилэдан касалад, пастуха рупитал.

Энамты ёх, Валентина Кондыгина педа, худантылат па иса муй мосал инщасылат. Яма рупитмал ураңан дув ар пуш арсыр мойлапсаятн мойдыдыса. Щит Благодарность Дорвош район куца элды 2011-мет талн. Почётная грамота Дорвош район куца элды 2015-мет талн па Благодарность Дорвош район Дума элды 2019-мет талн. Вет тал хащамн Почётной грамота Губернатора Ямал мувев элды юкантам. Щи тумпина дув Ветеран труда па Ветеран Ямала нэм тайл. Няврэмлад вещьката энмалтмал ураңна кат «Медаль материнства» мойдаман тайл.

Тампуш сус пораян Валентина Алексеевна 79 тал сэма питам хатад постаты питал. Папуш па дув нийлгяң тада йил, ун юбилей постаты питал. Щи арат тада ванамаман дув холна рупитты верытл. Энамты хоятата щимащ хоятат педа мосал вантман удты па рупитты.


Яна щи, нэ ёшатн улапса елды хатад. Хота нэ ёш катласал, иса туңа манал. Тамаш юраң па вещькат нэңиет вуды тащ хотатн улдат па рупитлат. Холна ар дув элдылал рахал ханштыя. Ат елды тумтака улдат!

Иван Сандрин ханшам потар



Хор: Виктор Саян

# Апраң, каркам па рэняң ха



Владимир Алексеевич  
Итыков

## Олаң пуш округеван кассат

Си едпийн, Ёмвош округ элты хоятат касты ант ёхтыдысат. Туп вулы ухлат эталтысат па вулы ухадан навралтысат. Тампуш тадаң команда дэсатса.

Касты хоятат кутан Владимир Алексеевич Итыков Сургутской район элты ус. Каматса ясаң ястас: «Тампуш Ёмвош округ элты касты хоятат вохсайт. Сишан муң команда акатсув па ты ёхатсув. Си едпийн муң туп муң округеван вулы ёх емаң хатлатан кассув. Ма олаң пуш там вошан усам. Хоятлув ты емаң хатл вантты ёхтыдысат. Касты сирн ант яңхсув. Тата ма тынсяң сува ёвалмисам, юх талсам па пертысыман юрасьсам. Командая луңтасты хоятат этнобиатлонан па дохан хатэмиты эстафетайн кассат».



Кашң тал округ хуват манти вулы ёх емаң хатлатан тащан яңхты хоятат касты харатан уйтантылат. Тампуш Надым мува Дорвош район элты тасян яңхты па Пулцават вошан Ямальской многопрофильной колледжан уталтыты хоятат ёхтыдысат. Си тумпийн Ёмвош округ па Надымской район элты ханты хоятат па усат. Там лопасан касты ёх элты потрэм тулэм.

## Колледжан уталтыты Овкорт похқан

Овкорт элты Ямальской многопрофильной колледжан уталтыты энамты похқан – Яков Артёмович Куртямов па Юрий Константинович Лонгортов усқан, потар тусқан.

Яков Куртямов ситы ястас: «Ма Овкорт элты улдам. Пулцават вошан многопрофильной колледжан олаң курсан вулы яммалтыты леккара уталтыдам. Надым воша па олаң пуш ёхтыдысам. Нэмолты порайн касты ант яңхидысам. Олаң пуш тамась тахая пилтасьсам. Тата ухал шоппи наварсам, тынсяң сува ёвалсам, хулам пуш навармисам па дохан хухатлыты эстафетайн кассам».

Юрий Лонгортов па ясаң верас: «Ма па Пулцават вошан уталтыдам. Овкорт элты, аңкем-асем худ велпаслаты хоятқан. Оволаңкуртан худ велман улдаңан. Ашкуда элты касасаята яңхты пилтасам. Ин па округ хуват манти касасаята пилтасилам. Колледжан муңев Денис Сергеевич Лонгортов касасаята дэсятлалды. Ты па дув тутдысды».

Юрий  
Константинович  
Лонгортов

## Питлор куртаң хоят

Касты хара яңхам похлув ар пелак тащан яңхты ёх. Йи пох туп худ велпаслаты хоттэл элты. Хулам похев колледжан уталтыйд. Хол ханты улапсаев елды тулат.

Муй хорпи касасайн касас, хоты улапсайл манал, Питлор элты ёхтыдыйм Василий Владимирович Максаров ясаң верас: «Ма тащан яңхдам. Касты тахайн дохан нёхамтысам па тын ёвалмисам. Надым вошан кимет пуш усам. Нял тал хасяс, хоты ёхтыдысам. Си порайн ал вантты яңхсам. Ин па касты вохидысайм. Муң хут хоят усув. Хой тынсяң ёвалмас, хой ухал шоппи наврыдыйс, хой па дохан хухатлыйс.

Ашкуда етшамем юпийн, мохты аңкем-асем пилан вулы хотан яңхсам. Асем – Владимир Егорович Максаров, аңкем – Ольга Дмитриевна Максарова. Ин холна нётман яңхлаңан.

Муң Горковской совхоза луңтаслув, худмет тасян рупитлам. Нял хоттэл, хулам хотан уллув. Холна яйем – Николай Владимирович муң пилэван яңхал. Ешаул, луң тахая, Воркута педа касалдув. Талан Дорвош район Хольце дор пуңалан дойлув. Вулы антом шеңк ар тайлув. Совхоза вулы нёхи маты хоятлув кутан олаң тахайн уллув. Ялап тал едпийн вулдылув хорсув».

# манты ёх юрдал арталдасат



## Мужевской совхозан рупитты ху

Надым воша Мужеи вош элты холна Станислав Юрьевич Рохтымов ёхтыдыйс. Лув тащан яңхал. Олаң пуш там мува ёхтыдыйс. Касты тахайн дохан хухатдыты эстафетайн касас па тынсяң сува ёвалдас.


Улапсайл элты потар тус: «Ма рутдам, аңкем Ульяна Григорьевна пидан тащан яңхлам. Мужевской совхозан кимет тасян рупитдам. Евгений Анатольевич Талигин бригадира ул. Худам хотан улдув.

Ешаул луң тахайлува, Саран мув педа касалты питлув. Муң ун кер тыдась хасям хатлатан маныдылув. Ёхлы па Ас потты тыдасян кердалув. Талан Ёханкурт элты хольмаң километрайн дойдув. Совхоз тумпийн, муң ёра вулэт па тайлув. Хасям тал етшаты едпийн ветъяңкем вуды хорты мийдысув.

Ма холна Дорвош районан манты вуды ёх емаң хатла яңхты утсидам, сита касты питдам».



Станислав Юрьевич Рохтымов



Василий Владимирович Максаров

## Надымской район эталтыйм ёх

Надым вошан манты емаң хатлата ар пелак ур хоятат ёхтыдылат. Тампуш ар ханты хоят шиядаты рахас. Ар касты хоят ус. Надымской район эталтыты ханты хоятат па ёхтыдысат. Яң хоят ус.

Муи касаспайн кассат, Виталий Степанович Мултанов ясаң тус: «Ма Муравленко вош элты ты ёхтыдысам. Хут хоят Муравленко вош элты ус, няд – Надым вош элты. Муң антом кашң тал касты яңхлув. Няд тал сые йи пуш туп актащлув. Антом кашң касаспайн каслув. Ар пелак этнобиатлонан, дохан хухатдыты эстафетайн па тынсяң сува ёвалдув.

Ма Надым лепан касалдам, вуды шавиман улдам. Аңкем-асем Ёмвош округ Сургутской район элты улдаңан. Аңкем Конкин рут элты. Дын сита улдаңан.

Муң йи тахайн касдылув, тал-луң лотлув хольмаң-ветъяң километрайн улдат. Вудылув товийн нюрма вошталдув, талан унтан яңхлат, коралян улдат».



Виталий Мултанов кутопан дойд.

Хор: Альбина Тырлина

# Кадаңаң нэңхэт емаң хатлдна хольмаң ор хат аматла


Тампус Пулңаватна кадаңаң нэңхэт емаң хатлдна мет ар ор хат аматла. Аратэдна хольмаң хат ропытта питал. Щи томпына Дмитрий Губерниев па ёхатал.

«Касң тал, кадаңаң нэңхэт емаң хатлдна волаң касты хар, щит кадаң охлатна навралтыты вер, ма щита потар сый верты пормас хуват потремита питдам, матты кадаңаң охал номер мет ямас манал, хой ялта-сак хыщал, аса ма лавта питдам», – «Матч ТВ» телеканал журналист Дмитрий Губерниев лавас.

«Алаң таха сытты нэңхэт лонщхопатна мадайт, ялта-сак хыщтытат па ох майдапсы сытлат», – Ямал мув губернатор пресс-служба хоца хансса.

Пулңаватна кадаңаң нэңхэт емаң хатл ай кер тылащ 21 па 22-мет хатлданна Полябта ёхан сыдна манта питал. Щита камантсы хар лэщатла: касты ях, тынэсты па гастротиваль верты ораңна. Майң нэңхэт ораңна па хольмаң ор хат сохла.

Тампус мет алаң пус йис порайна лялесман тайм пормасаң ор хат аматла, щита алты кесэт, наганат, поска-



нат, эл сайдаман тайм корты лапсат па хат лыши пормасат вантта рахал. Кимет ор хатна па шимлаң мир сохатна хор верта рахта питал. Аканят эттыды ораңна па выставочной хат ропытта питал. Леккарат ораңна щирел хат, хой

леккар вер сахат инщисты вер ки тайл, щита лоңемита

рахал. Емаң хатлдна холна холам гостиница-ор хат ропытта питал. Мув вантман яңхты ях ох сахат щита хойта веритта питлат.

Гастротиваль верты ораңна шеф-повар па телеведущий Александр Белькович ёхатл. Тампус кавартам кадаң нёха рекорд аматты вер ол. Майдата ёхатты нэңхэт ораңна худ хасэңк кавартла, патам худ па нёха нёхарла, щит юпина тут хар сыдна па сай еныщат.

Вера Лонгортова хансам потар

Хор: Вера Лонгортова

## Сорашак айкел моцатты ураңан

«Лух Авт» газета кашң лапат йи пуш этлыйд. Тухал ишан, ёхаттал унты талаң лапат хашал. Щи веран, сорашак айкелат моцатты ураңан, нынан мосал «Лух Авт» поныдыты айкелат «ВКонтакте» па «Одноклассники» хоца моцатыты.

Щи ураңан там QR-код мохты лоңаты, па муң верыдыты айкелдува ханшлтыты. Кимет веран, айкел лоңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыел-тохел поныдылэв, вантлэв – мата айкелат па муй элты хоятат лоңатты лаңхалат.

Тумтак ёшна, тумтак курна ханты мир улапсаев ияха понасман елды тулэв, ханты мир ясцев шавилэв!



## ОБЪЯВЛЕНИЕ

Там QR-код хуват лоңаты па вантаты, муйсыр нётопсайт СВО хоца улты мохета мадайт. Щи тумпийн нэңдала, няврэмдала, аңкидала па ащидала ищи нётопса вуты рахал.



ПОЛНАЯ ИНФОРМАЦИЯ ПО ТЕЛЕФОНУ  
+7 (902) 816-11-90  
+7 (34922) 3-98-08  
ЗВОНОК ПО РОССИИ БЕСПЛАТНЫЙ

**СЛУЖБА ПО КонтРАКТУ В ВС РФ**

**ВРЕМЯ ДЛЯ ВАЖНЫХ РЕШЕНИЙ!**

**КонтРАКТНАЯ СЛУЖБА**  
**6 700 000 Р**  
**ЕДИНОВРЕМЕННАЯ ВЫПЛАТА**  
**4 000 000 Р**

ПРИ ЗАКЛЮЧЕНИИ КонтРАКТА НА ЯМАЛЕ

Приблизившим из других регионов возмещаются затраты на проезд от места проживания до г. Салехарда. В период формирования подразделения в г. Салехарде и 3-разовое питание предоставляется бесплатно.

**ОБУЧЕНИЕ:**

- ✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 600 000 Р ЕДИНОВРЕМЕННАЯ ВЫПЛАТА  
до 120 000 Р СЕПТЕМЬ НА ФИНАНСИРОВАНИЕ

400 000 Р МИНИСТЕРСТВО ОБОРОНЫ  
ЗАКЛЮЧЕНИЕ ВОЕННОГО СОЦИАЛЬНОГО КонтРАКТА

**ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО** **ОТ 225 Т.Р.**

# Йи кур ики

Йи кур ики посл путарна омасл. Нёл верал. Юхал вермад. Хатл тэваң. Имомтына вантладды: Поднары пурдал.

Увал:

– Йи кур ики йинцлэм, Йи кур ики лэдэм!

Поднары-ы, поднары-ы, поднары-ы!

Ил ши латас.

– Таха, таха! Манэм лэты вутцилды? Манэм велты вутцилды? Са-са, нёлэм ат етшал, ма наңен вантлэм! – нумасл Йи кур ики.

Ешаул ин войн па ши увалтас:

– Йи кур ики йинцлэм, Йи кур ики лэдэм! Патдат, патдат, патдат, патдат, патда-а-т.

– Тё-о, са-са! Ши етшас! – ястал Йи кур ики.

Нёдал пастасды, шицанца, ши сухтасды! Эслапсалды! Ин вой, шицанца, волдыя пелантса – рагнас!

– Шит ши каншсан! Ма наңен ин лэдэм, ма наңен ин йинцлэм, наңен! – ляватад Йи кур ики.

Нох сухатсалды войл, шицанца, пута молсалды! Пут каварал.

– Са-са, ма наңен лэдэм ин! Эй, ерта йис. Ой, ши мордайм! Путэм ёхи алэмалэм па ёдан тонты хотна каварлэм, – лув сахатл Йи кур ики ешацл.

Тонты хота понтсалды, шицанца. Па ел тутал адсалды: каварал, каварал. Имомтына пут шикем волды вошты питас, война хувдаса! Ин вошчал ши ил амарал. Эптам отал куршкая понал, шалта пута пондалды. Ветра алэмас, ветрая понас.

– Па муй тахая, па муй тахая понты? – увл ин икен.

Тыел-тохел кердытал элты войл тута ил щёшатас. Тутна нох холькаса! Ин тонты хот нох ши ёсыты питса!

– Эй-и! – ин ики ши увты питас, увты питас.


Шецанца, ин ики тата дэса, хотал дэса. Пут лыпина – тал пут хащас. Ин Поднары, пунаца йис. Нох пурдамтас па увалтас:

– Йи кур ики йинцсэм, Йи кур ики лэсэм!

Шиты ши манас.

Ши ястаман: «Емаң вой ад кетмадан!».

Роман Григорьевич Кельчин монцас Аллина Тоярова нэпека ханшсалды



– Йи кур ики йинцлэм, Йи кур ики лэдэм!

– Йи кур ики выпью, Йи кур ики съем!

– Манэм лэты вутцилды? Манэм велты вутцилды? Са-са, нёлэм ат етшал.

– Это он меня хочет съесть, это он меня хочет выпить? Погоди, сейчас стрелу доделаю.



Нёдал пастасды, шицанца, ши сухтасды! Эслапсалды! Ин вой, шицанца, волдыя пелантса – рагнас!

Натянул тетиву – упал кулик



Пута молсалды па каварты питсалды.

Положил в котёл и стал варить.



Войл ил эптас, тута ил питас.

Жир кулика всё вытекает и до огня дошёл.



Иса нох усилдаса.

Всё сгорело.



– Йи кур ики йинцсэм, Йи кур ики лэсэм!

– Йи кур ики выпил, Йи кур ики съел!

Ай полнары ястом верл версалды.

И маленький куличок слово выполнил.

Ши. – Всё.





СУРГУТСКИЙ  
ДИАЛЕКТ

# Самлэх-пэллэх пырәс ИКИХЭН-ИМИХЭН

(Олаң шупал  
№ 9 луңталн)

Тэм аңкэнөш, лэйәлл, қор йә-  
мат вөйәң қор, йа пут кэвэртәнә  
йаңк вәрта қө ти чүксәмәх. Пут  
утә ти вөйи тақа, лита йәқән ти  
чүксәмхән вәлә йәчәнә. Тақа ими  
қоләх йаңк вәр, панә вөйәң һавит  
әйнам йаңка ти кәртәлал. Йаңкәл  
тәкәнәтә кәртәтәх. Тутәлнат өс  
лүв лив. Лүвә лита ымәл. Тақа  
тутәлнат қочәм йәңкәл учнат әй-  
нам йиһтәхтәтән. Лүвпә қочәм  
йәңк йиһт.

Йа тақа қочәм йәңк йиһтмин  
пырнә ики һавмиләл имиnam:

– Вәлә, нүң әвлән?

Ими һавмиләл:

– Энтә қәлат әвләм, ма этә  
энтә әвләм. Энтә қәлнә тит мин  
әсәккә йәхминнә ар лита қәлат  
йәхмән? Мәқи мин ма төм әвәлтә  
вәр төймән. Қәлнә мин тит тәнә  
йәхмән?

– Сә-сәр, тақа қәлтахәл қәләм  
оли күрәң войәх вохләмән. Қәләм  
оли һөв вохләм. Мүв үрәккәнам  
қәлат тәнә йәхмән?

Арийәлтәтәх, лүват әйнам  
энтә вутын қәрасәп. Тақа кәм-  
нам мәнәхә ти йәх, ики ахән  
һәлчәхты.

– Вәлә, ими, нүң ма ихнәм  
мүват һәлчәхтә?

Ими һавмиләл:

– Қунтә ма нүң ихнән һәл-  
чәхтәм?

Ту вәр ай вәлмалхә питәм  
пырнә лүвнә ими ахән  
һәлчәхты.

– Вәлә, ики, нүң ма ихнәм  
мүват һәлчәхтә? – йоққән  
лэвәтта ти питхән.

– Мунт йәстәлән, нүң ма  
ихнәм мүват һәлчәхтә. Ит өс  
нүң ма ихнәм һәлчәхтә.

Тутә лат йиңкәл кәтәлмин  
һәтәләккә әй кәтәлнат өвпи пу-  
нчәх, әй кәтәлнат өвпи лиңкәх.  
Тутлат итпә мән. «Аңкәнөш, им-  
эм хонна һавмиләл, тәнам ал  
мәна! Йәм мәта тохи лүв нымән  
тәт қәһитәтал тохи! Қәлтахәл  
сәр әнәлчәк йаңк вәрләм! Мунт  
йәстәл, қәләм оли күрәң войәх  
вохләм. Йа тақа йәқәнам мәнләм.  
Мүв аңкәнөш сәх пән, һавәм ти  
тувәм».



Хор: Альбина Тырлина

Мүв тохи сәх пән лотта!  
Пөнәл пә энтә луттәх. Нәви ти  
тув, йәқәнам мән. Йәқә йөвәтмәла  
вәлә тиминт нәви йаңк тув.

– Сәх пән лотта йәңкма қөв  
мәтә мәри йәңкән. Вәлә тит өс  
мүвли тувән? – имил йәстәл.

– Тақа лива, лива, лива,  
ләңкләх-сүйләх!

– Ма вәлә нүңаты йәстәм,  
қөта мәта тохәтнә энтә  
йәңклән, – имил һавмиләл.

– Аңкәнөшлиңки, тәхә йәләх  
урәт ал вәрәнәтә! Нүң қәлнам  
йәңклән? Нүң нәмәксәхәлән, йәм  
мәта этәт тәт вәлләт? Нүң йәхла-  
йохла ливәм этәт тәт вәлләт. Нүң  
энтә йа тәхнам йәңклән? – имил  
алә өв пәләк күнчиләл. – Тәми  
қөты йәхән? Нүңат ти лөвитхә  
әнәмтәм. Нүңат титәтнә литә  
тохи кәнчлән. Тит вәлә йәхла-

йохла ти ләки мәнәт. Нүң қөйәнә  
қөйәхинә тәнам йәңкәтә партлө?

– Кәш, әй қәлатынам пә энтә  
йәңкәм, тәхә лива, вөйәң нәви  
ливә!

Имил қөты йәл? Тәхә нәви  
литахә чүксәмәх. Қөты пә йәл.  
Туминт пыр аләң тақа, вәнчана-  
пөчана қәтәл нөқ қөтәл, имил  
йәстәл:

– Нүң қәлнам?

– Ма тақа сәх пәнам лотта  
йәңкләм тәм қәтәл.

Имил йәстәл:

– Нүң тақа йәмнам қәтта ал  
йәңка! Тәхә сәх пәна лута, панә  
тәхә пәрхинам йүва!

Тақа өс мәта аңкәнөш! Сәх пән  
лоттә, сәх пәнәла йөвәтмәла, әй  
мөчхә, панә мәнәтал сохит йаңк  
йүх әвәт, па әй мәчхә йаңк вәр,  
әнәлчәк йаңк.

Тәхә йәқә йөвәт, әй кәтәлнат  
өвпи пунчәх, әй кәтәлнат өвпи  
тәвәртәх. Мунт вәлә вәр өнәлтәх!  
Мүв латнә наркасәлхән, тәхә  
чүч өвтыяа ымәл. Тәми әй латнә  
усилтахән, вәр күч арийәл, тәми,  
лүват әйнам энтә вутын қәрасәп.  
Йәмат һөлләх-сәмләх, әсәккә  
йәхәм имиһән-икиһән.

Вәлә ики усил:

– Ими, нүң лита йәхән? –  
йәстәл.

– Йәхәм, тақа, лита.

Ики йәстәл:

– Мампә тақа йәмат йәхәм лита,  
молқәтәл мүв ура тит йәхмән,  
әсәккә пар йәхминәнам.

(Еллы па ул)

Аграфена Сопочина  
ханшсәллы

## Газета

«ЛУХ АВТ»

Адрес редакции:  
629003, ЯНАО,  
г.Салехард,  
мкр. Богдана Кнуянца,  
д. 1, каб. 106  
+7 (34922) 4-68-63

E-mail:  
luh.avt@yamal-media.ru

## Учредитель

Департамент внутренней политики  
Ямало-Ненецкого автономного округа  
(629008, ЯНАО, г.Салехард, пр-кт Молодёжи,  
д. 9, каб. 708)

## Газета зарегистрирована

Управлением федеральной службы по надзору  
в сфере связи, информационных технологий  
и массовых коммуникаций по Тюменской  
области, ХМАО-Югре и ЯНАО  
19 апреля 2012 года  
Регистрационный ПИ № ТУ72-00558

## Тираж 1300 Заказ 74 тз

Подписные индексы:  
на год – ПА700, на полугодие – ПР561

## № 10 (1313)

Газета вышла в свет 7 марта 2026г.

Подписано в печать 5 марта 2026г.

по графику: 16.00

фактически: 16.00

Газета выходит по субботам

Цена годовой подписки 88 руб.,  
в розницу не распространяется

## Издатель

Департамент внутренней политики ЯНАО  
(629008, ЯНАО, г.Салехард,  
пр-кт Молодёжи, д. 9, каб. 708)

Отпечатано в АНО «Ямал-Медиа»  
Юридический адрес: 629003, Ямало-  
Ненецкий автономный округ, г. Салехард,  
мкр. Богдана Кнуянца, д. 1, каб. 106

Фактический адрес: 629007, Ямало-  
Ненецкий автономный округ, г. Салехард,  
ул. Чубынина, д. 39А

## Генеральный

директор

АНО «Ямал-Медиа»

Зулинова

Марья Андреевна

## Главный редактор

Яковлева

Аллина Кирилловна